



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8



Tir Muizzu-i aniba teloki Maldives election kokogo

Kohli dang pa indang match fee shilem 50 senchi achi



VOL. XXI ISSUE NO. 190 (ADOK 190) DIMAPUR SANGTENNÜ (TUESDAY) RONGCHII (APRIL) 23, 2024 ₹ 5.00

Apr 26 nü HSLC & HSSLC results adoktsü

Dimapur, April 22, 2024 (Agencies): Nagaland Board of School Education (NBSE)-i April 26, 2024 anüingdang HSLC (Class 10) aser HSSLC (Class 12) results metetdaksütsü.

NBSE-i February 13 nungi 23, 2024 tashi High School Leaving Certificate (HSLC) aser February 12 nungi March 6, 2024 tashi Higher Secondary School Leaving Certificate (HSSLC) tatidangtem agia liasü.

May 3 nungi May 6, 2024 tashi school tem nem mark sheets agütsütsü aser ibaji Centre Superintendents-i acha-ayangtsü ta NBSE Chairperson Asano Sekhose-i tanü sangdong ka nung ashi.

NBSE nung register süa aliba reju shia dangi Result Gazettes den Marksheets/Pass Certificates. yoktsü aser www.nbsenl.edu.in nung soft copy angutsü ta lai ashi.

NBSE Portal nungsa Migration Certificate download asütsü link agütsütsü.

INTERNET:

1. www.nbsenl.edu.in
2. www.indiaresults.com
3. www.results.shiksha
4. www.jagranjosh.com

Tsünglanglen agüja alidak nungi marks/marksheet angutsü akok:

- a. www.nbsenl.edu.in
- b. www.indiaresults.com
- c. www.results.shiksha

Northeast nung tzünglu kanga arutsü

Guwahati, April 22, 2024 (Agencies): Taruba anogo pungu tashi Northeast kübok state ajak nung tzünglu kanga arutsü aser yipru süitsü.

Assam aser Bangladesh madak tzünglu arutsüba mopung ka lir ta India Meteorological Department (IMD)-i ashi.

Külen, Bangladesh nungi Bay of Bengal leni mopung ka aontsü. Iba ajanga Northeast ajungalen tzünglu arutsü aser tsüngsang

majungtsü ta IMD-i ashi.

Hombar nungi Brihostibarnü (April 22-25) tashi Arunachal, Assam, Meghalaya, Nagaland, Manipur, Mizoram aser Tripura nung tzünglu mesüra rü terara tsütsü.

Tsüngsang majungbaj Hokolbar nungi Honibar tashi nung ang süshitsü. Iba mapang tsüngda tsüngpret ayatsü aser mopung kanga aontsü ta IMD-isa metetdaksü.

IGAR(N)-i Governor Ganesan den ajurutep

Dimapur, April 22, 2024 (TYO): April 22, 2024 nü Inspector General Assam Rifles (North) Maj Gen Manish Kumar, SM-i Raj Bhavan nung Nagaland Governor La Ganesan den ajurutep.

Senden nung Maj Gen Manish Kumar-i Governor Ganesan den Nagaland aser South Arunachal Pradesh nung security maparen

osang lemsatep.

Assam Rifle-i civil society, security agencies aser nübortem den tesentaktep tajung yua mapa inyaktsü tenangzükba lir ta paisa ashi.

IGAR(N)-isa Governor den Eastern Nagaland tensa aser Assam Rifles-i elections nung shilem agiba osang lemsatepa liasü.

Manipur nung telungpur 7 apu

Imphal, April 22, 2024 (Agencies): Outer Manipur Parliamentary constituency nung polling asütsü anogo matongdang Assam Rifles aser Manipur police-i Manipur-Myanmar arrtsülen mita aodang telungpur 7 puogo.

Parnok ya telungpur telok balala nungi züngsemtem lir aser parnok ket nung prangpong-injang aika puogo ta Hombarnü ketdangsürtemi ashi.

Inspector General of Assam Rifles (South) headquarters nungi tetuyuba ka agütsüba nung ajemdaker Hombarnü central aser state forces külemi Kamjong district, Manipur kübok Kangkum yimtsüng mita ao. Idangji parnoki telungpur pungu apu.

Kangkum yimtsüng nung telungpurtem aliba osang tejangja angazükba sülen Assam Rifles-i

mita aodang Kanglei Yaol Kanna Lup (KYKL), People's Revolutionary Pary of Kangleipak, (PREPAK) aser National Socialist Council of Nagaland -Issak Muivah (NSCN-IM) züngsemtem apu. Parnok ket nungi Rs 1,86,720 ngutetogo.

Külen, Churachandpur-Sangaikot road nung telungpurtemi tashiyim agi sen saruba osang angazükba sülen Assam Rifles aser police yaritepa mita aodang United Kuki Liberation Front (UKLF) züngsem ana apu. Tena ket nung 9mm Pistol ka, injangtem aser tanga osettem bena aliba puogo.

Manipur nung Lok Sabha elections shilem tanabuba April 26 nü agütsü lir. Myanmar, Mizoram, Nagaland aser Assam den arrtsütepa aliba district 8 kübok assembly constituency 13 nung polling asütsü.

April 26 nü Dimapur nung shishilembabaren ajunga shibangtsü

Dimapur, April 22, 2024 (TYO): Dimapur nung Naga Political Groups (NPGs)-i shishilembar nem timtem kanga agütsüba atema tejashi sayua April 26 nü shishilembabaren ajunga mokdangtsü osang metetdaksütsü.

Dimapur nung NPGs ajanga tanen makai tax sarur, amokmerener aser summon letters agütsür. Anungji onoki ajuruba khurettem agientsüsa mapa meinyakra onoki dokan

aser shishilembadak shibangba melapoktsü ta Dimapur Chamber of Commerce and Industry (DCCI)-i metetdaksütsü.

"State sorkar aser ozüng amertemi shishilembartem kümzüka ayutsü atema mapa inyaktsü mepishir. Sorkar aser ozüng amertemi shishilembartem khuret mangu metoktsütsüla" ta parnokisa ashi.

DCCI-isa civil society organisations aser public dang dokan aser shishilembadak

shibangba timtem aremstsü aser parnok den amalitepa yariteptsü mepishia metetdaksütsü.

DCCI-i memeteti shishilembar shingaia NPGs-i jaokba atema maotsü tetuyuba agütsütsü.

Dimapur nung shishilembartemi telok shinga anema masü saka talitabong sarusajiba aser tashiyim agi sen meshiba anema noktaker ta DCCI-isa ashi.

ENPO-i tanü rongdak CEC senden jazüka amener

Dimapur, April 22, 2024 (Agencies): April 19 nü Lok Sabha election nung takok ngua shilem magiba sülen Eastern Nagaland Peoples' Organization (ENPO)-i rongdak Central Executive Council senden ka amentsü jazükogo.

April 23 anepdang 10:00 ako nungi CKS Hall, Tuensang Headquarters nung senden amentsü ta ENPO-i ashi.

ENPO-i Tribal President aser General Secretary den CEC züngsemtem, Frontal Organization President aser

General Secretary den ketdangpurtem aser federating units nungi nübo asemsem, pei Baptist Association nungi Executive Secretary tem, Talk Team aser ENPO Advisors iba senden nung adentsü metetdaksütsü.

Manipur police-i Kuki nunger alidak ajanga süitsü tsübur

Imphal, April 22, 2024 (TYO): Election mapa lezmüksüba Manipur police aikati Hombarnü Imphal nung lungkak aitogo.

April 26, 2024 nü Outer Manipur Parliamentary constituency election atema parnok Tamenglong district-i maotsü ta police-i lungkak aiter.

Parnok Meitei nunger aser Tamenglong district-i aodang Kuki nunger teimba ser aliba Kangpokpi district adentsü aser idangji lendong ajurutsü akok ta police-i ashir.

Manipur nung Kuki aser Meitei nunger tsüngda rara nung

nisung 222 tema taküm samaogo aser tasürtem rongnung Manipur police 9 densema liasü.

Manipur sorkari police 260 tashi Tamenglong nung election mapa lezmüksütsü aser iba nungi parnok 197 tashi Meitei nunger lir.

Hombarnü Meitei nunger police 197-i Ghanapriya Women's College, Imphal jaktang lungkak ait.

"Onoki mapa meinyakli ta mashir. Onoki ketdangsürtem dang lendong maliba district/tesemtem nung election duties lezmüksütsü mepishir" ta police

kati ashi.

Manipur nung Lok Sabha election shilem tanabuba April 26, 2024 nü agütsü. Iba anogo district 8 nung assembly segments 13 kübok polling asütsü.

April 19 nü Inner Manipur Lok Sabha menden atema mezüngbuba shilem den Outer Manipur LS menden atema assembly segments 47 nung polling agiogo.

Outer Manipur LS menden nung candidate pezü lir aser parnokji Indian National Congress, Naga People's Front aser Independent ana lir.

Surat Lok Sabha menden nung BJP den tetokteper shinga mali kümogo

New Delhi, April 22, 2024 (Agencies): Surat Lok Sabha menden nung BJP candidate Mukesh Dalal den tetokteper shinga melii takok angutsü kechiyong tanüngba candidate ajaki nomination meyipa agiogo ta Gujarat BJP unit president CR Paatil-i ashi.

Iba constituency nung Returning Officer-i Congress party candidate aser pa substitute na indang nomination papers nung metokmeperi lir ta ser magizük. Congress-i iba ya "match-fixing" mapa inyaktsü merangba ka ta aitsütsü.

"Surat-i Prime Minister Narendra Modi nem mezüngbuba lotus agütsütsü. Surat Lok Sabha menden nung Mukesh Dalal den tetokteper shinga melii takok anguba atema pa nem tenüngsang agütsür" ta Gujarat BJP president Paatil-i ashi.

Iba constituency nung nominations meyipa agütsü anogo tatembangbaji tanü liasü aser candidate 8- Independent tenet aser Bahujan Samaj Party (BSP) nungi Pyarelal Bharti nungeri parnok nomination papers meyipa agi.

Surat candidate nung Congress candidate Nilesh Kumbhani indang nomination papers Deobarnü magizük. District returning officer Saurabh Parghi-i Kumbhani tenüng benokertem indang signatures nung tim masüba ajitetba agi pa indang nomination papers magizük.

Ano, Congress substitute candidate Suresh Padsala indang nomination form nunga metokmeperi aliba agi magizük.

Congress candidate anati agütsüba nomination forms pezüji chichiba masü ama reprangtet. Proposer temi parnok

affidavits nung sign masü ta shiogo ta returning officer Saurabh Parghi-i metetdaksü.

Ajisüaka, Congress lawyer Babu Mangukiya-i iba atema High Court aser Supreme Court dangi aotsü metetdaksütsü.

"Asen elections, asen democracy, Babasaheb Ambedkar'er Constitution ajunga lendong nung lir. Asen taküm nung iba election ya ajak dang tongtipangba asütsü" ta Congress lennir Jairam Ramesh-i ashi.

PM Modi'er "Anyay Kaal" nung micro, small and medium enterprise (MSME) kiburtem aser shishilembartem timtemer aser parnok jashiba atema BJP shisabulur. 1984 Lok Sabha elections nungi parnoki dang takok ngua aruba Surat Lok Sabha menden nung parnoki takok angutsü lenmang bushir ta Ramesh-isa metetdaksü.

Chümoukedima nung Free Cancer Screening Camp agi



Chümoukedima nung Free Cancer Screening Camp agiba sentong nung tangokba noksa.

Dimapur, Rongchii/April 22 (TYO): Holy Redeemer Health Centre, Chümoukedima nung St. John's Medical College, Bangalore den lungjemer Free Cancer Screening Camp ka April 22, 2024 nü ayongzüka liasü.

Iba sentong nung Dr. Antoly Swu, Deputy Chief Medical Officer, Department of Health and Family Welfare, Dimapur tesemdanger tongti liasü.

Iba camp nung St. John's Medical College, Bangalore nungi Dr. Shashikala, HoD, department of Gynaecology and Obstetrics aser Dr. Vishakha, Senior Resident of OBG Oncology department nati anir screening ya agia liasü aser Rev. Sr. Dr. Rosemary UFC, Dr. Angeline aser mozüki nung staff temia yaritep.

Cancer tashidak den takok

ngua raratsü asoshi kera putettsüji kanga tongtipang lir ta iba camp nung adener nem angatetdakja liasü.

Iba sentong nung Rev. Dr. James Thoppil, Bishop of Kohima; Rev. Fr. John Thekkekkara, Deputy Director of St. John's Medical College, Bangalore aser Razouvotuo Chatsu, President, Angami Public Organization (APO) nungertem dena sentong tali mera ketdaksü.

Rev. Fr. Chacko Karinthayil, secretary, Health Commission, Diocese of Kohima ajanga tarur pela agizükba o jembi aser Rev. Sr. Christy Maria, Administrator, Holy Redeemer Health Centre ajanga Lai azüng aser Rev. Fr. Anthony Dukru, Principal, St. Joseph Parish, Chümoukedima ajanga Tsüngrem temoatsü jazüka

sarasadem.

Healthcare mapa inyaker, nübur lenirtem aser volunteers tem lungjemer inyakba ajanga healthcare tsütsüa mapa tajung inyaksü asoshi telungjem nung tashi aliba sayua liasü.

Iba camp yagi nüngdabapur nem awareness agütsüba kisüng masü saka nüburtem anema alitsü asoshi teyari agütsür.

Cancer tashidak buloa aliba state tem rongnung Nagaland ya ka lir, saka iba tashidak anepalutsü facility peria makaba ajanga iba tashidak agi menepa alir aika state yutsür aotsüsa akumer aser rongsen jenti indoker.

Tang cancer tashidak anema raraba nung iba ama sentong yagi maneni lenmang lapoktsütsü aser nüburtem maneni yaria tajangzük angütsü.

Mkg. aser Kohima nung Lok Sabha election mapang amshiba gari taa meshitsü tuyur

Dimapur, Rongchii/April 22 (TYO): 18th Lok Sabha election mapang Mokokchung district kübok election duty nung amshiba gari taa arua DC & DEO Mokokchung office nungi meshitsü Deputy Commissioner & District Election Officer, Mokokchung, ThsuvisiePhoji-i metetdaksü.

Mokokchung district kübok Local Taxis (Sumos, LMVs, etc), jurila gari tem aser Village Councils ajanga requisition asüba atema April 25 & 26, 2024 anogotem anepdang 10:00 ako nungi nikongdang 4:00 ako tsüngta arua meshitsüla.

Assam aser danga state tem nungi bener arua amshiba Pick-up/Buses aser danga garitem atema taa ya April 29 & 30, 2024 anogotem anepdang 10:00 ako nungi nikongdang 4:00 ako tsüngta agütsütsü.

Item taa abeni arudang

Requisition Order aser Vehicle Duty detailment order amala document tejangja bener arutsü metetdaksür, ta sangdong ajangasa ashi.

Deputy Commissioner & District Election Officer, Kohima, Kumar Ramnikant, IAS-ia sangdong ka nung Lok Sabha atema General Election 2024 agiba mapang election duty nung amshiba gari taa Deputy Commissioner & DEO, Kohima indang office ground floor nung aliba Transport Cell nungi agütsütsü, ta Hombarnü metetdaksü.

Taxis/LVMs tem atema April 25, 2024 aser Sumo/Pick up/Buses amshiba atema April 26, 2024 anepdang 10:00 ako nungi nikongdang 4:00 ako tsüngta agütsütsü.

Original requisition order aser duty slip agütsüba sülen ang senotsü ya agütsütsü, ta sangdong ajanga ashi.

NCSN/GPRN ajanga motorcycle Yamaha R-15 ka nguteta lir

Dimapur, Rongchii/April 22 (TYO): NCSN/GPRN indang UT-1 ajanga sentsü tanak BS-4 Yamaha R-15 ABS motorcycle ka nguteta lir aser iba motorcycle registration number ya NL 07 EA 4962, chassis number ME1RG5255K0055555 aser engine number

G3K5E01XXXXX alitsü ta Caretaker UT-1 indang office ajanga sangdong ka nung ashi.

Anungji kiburi mobile number 9863823864/7627921520 den jembia documents tejangja bener arua anogo tenet tsüngta iba motorcycle agizüksü metetdaksür, ta sangdong ajanga ashi.

Naga nunger ka nem European Commission-i teyari agütsütsü



Dr. Ethungshan Shitiri

Dimapur, Rongchii/April 22 (TYO): Okotso yimdak nungi Dimapur nung alir Dr. Ethungshan Shitiri nem Marie Sklodowska-Curie Actions Postdoctoral Fellowship ajanga küm ana

atema teyari sen €165,000 agütsütsü. Iba sen yagi principal investigator Dr. Shitiri nem BeNiFiT Project atema teyari agütsütsü.

BeNiFiT Project yagi healthcare melenshia intra-body nanoscale communications (IBNC) amshitsü meranger.

Iba technology nung nanomachines amshitsü, koba azü nung tuloktsütsü aser kanga kera tashidak tem shidak putettsü.

BeNiFiT Project yagi cancer, diabetes aser Alzheimer amala tashidak tekeraba nung puteta samatsütsü aser rongsen kanga ajema indoktsü nükjidong lir.

BeNiFiT yagi bloodstream nungi medical professionals mesüra shiranger nem indang-indanga real-time data agütsütsü aser ibaji ajanga tashidak tekeraba nung mezüng-mezünga putettsü.

Tang Dr. Shitiri ya Universitat Politècnica de Catalunya (Barcelona Tech) nung NaNoNetworking Center of Catalunya (N3Cat) nung Human Body Group anir lir.

Pai Information and Communication Engineering nung Ph.D. ya 2018 küm Kyungpook National University (KNU), South Korea nungi ngua liasü.

Livingstone Foundation International nung World Earth Day amung



Dimapur, Rongchii/April 22 (TYO): World Earth Day nungtem nung Livingstone Foundation International nungi CTO, Bobby Bol Zeliang-i anir 1 Naga Air Squadron NCC ajanga "Conserve to Preserve" omen nung ajemdaker libajen wazüka ayutsü asoshi maparen balala inyaka liasü.

Iba sentong nung shilem ka ama cadets temi awareness

agütsütsü aser tarutsü lima temürekba aser tajungba kumdaksütsü nükjidong nung mera balala agia liasü.

Iba anogo kaketshir temi anir Pledge Taking Ceremony ka agi aser oiba sülen school campus telungzük nung Cleanliness Drive ka agia liasü.

Kaketshirtemi alima wazüka ayutsü aser natural resources meraksai kumzüka ayutsü

asoshi tenangzükba agia liasü.

Parnokisa carbon footprint ajemtsü, jana tajemba indoktsü aser libajen wazüka ayuba sentong balala nung shilem agütsü nangzüka liasü.

Kaketshirtem kioktsü aser juli bener school kima kinük-kisang ajak tejangraba tulu nung mürek-müreka oka ao aser jana bendenba tim tesem nung indoka liasü.

Assam Rifles-i state nung maparen balala inyak



Dimapur, Rongchii/April 22 (TYO): Kohima nung Old NST terminal anasa arishi küm 11 tebur chanu ka Underground drain-i ajoka yiogo ta April 22, 2024 anepdang 9:00 ako meta osang aruba sülen Assam Rifles

temi Quick Reaction Team den JCB aser Ambulance yoka liasü.

Tanursang ya kilentzü aoba lenmang temesü nung mejepdaker jepa liasü. Iba mapang Assam Rifles temi State Disaster Relief Forces den lungjemer operation agia tanur ya kumzük aser temang anepalutsü atea Naga Hospital-i anir ao.

Ano Assam Rifles temi Operation Sadbhavana Project kübok Indo-Myanmar arütsülen Noklak district nung aliba Langnok yimtsüng nung Self-Help Groups (SHGs) nem sewing machine aser chilli power making machine lema agütsüba sentong ka April 22,

2024 nü ayongzüka liasü. Tetsür nem rongsenketzüng tsütsü tashi ka agüja parnok takum jenjang yanglushitsü nükjidong nung iba sentong ya ayongzüka liasü.

Maneni libajen wazüka ayutsü tangatetba nung Assam Rifles temi April 22 nü World Earth Day nungtem nung süngdong atemba sentong ka ayongzüka liasü.

Alima nung süngdong-lidong ajema akumba indang awareness agütsütsü nükjidong nung süngdong atemba sentong ya Phek district kübok Meluri Sub-division nung ayongzüka liasü. Iba mapang parnoki Akhen, Ziphu, New Thewati aser Meluri Town amala awajema liasü.

Item yimtsüng aser jila nung alirtemia iba sentong nung tejangraba tulu nung arua shilem agia parnoki süngdong 960 tema liasü

KIBONG KÜMER KÜM 81 AJUNGBA BENJUNG MUNG

23.04.1943 - 23.04.2024

Obala arishi kum 106 aser Ojala arishi kum 104



Wb. Sakulepden Longkumer & Wt. Nükmila Jamirtsür (Akhoya)

Temeim oja aser oba, nena kibong kümer kum 81 tashi nenaprongla anema lia tongtetdaksüba taochi otsü ya tesümgangtsüka lir. Iba taochi aser temoatsü anogotem bilemteta tanü nür chirnur aser semchirseemnurtemi Kibuba nung sanga nena den pelatepa amonger. Nena ya onok asoshi Tsüngremi balaka shimteta moatsüba tsüraburtem lir. Kum 81 tashi apuani süa aruba anogotemji temenungratsüka aser jangratemtsüka, tangang ano nena kibong tasen akum ama bilemer. Tsüngremi ano ozü tsürabur tajung ana nem külemi maneni alitsüsa mapang tajung aika moajangma.

"Shirnok temeim nung alir parnok Tsüngrem dak alir aser Tsüngrem parnok dak alir." 1 Yohan 4:16.

Temeim Chirnur, Semchirseemnur aser Anükpangtem.

India-i MDH aser Everest indang spices tendangtsü: FSSAI

New Delhi, April 22

(Agencies): India nung MDH aser Everest indang spices kar nung cancer tashidak adokdaksüba chemical densema lir, ta shia Hong Kong aser Singapore nung item spices ayokba nokdangba sülen Food Safety and Standards Authority of India (FSSAI)-i item spices tendangtsü atema telemtetba agiogo.

April 19, 2024 nü Singapore-i Everest indang Fish Curry Masala nokdanga liasü; iba masala nung carcinogen ta züngshiba ethylene oxide lir aser ibaji melaba 'level' dang nungi tali lir, ta Singapore Food

Agency-i metetdaksü.

Singapore Food Agency-isa, 'ethylene oxide' ya chiyungtsü nung amshitsü temelaba agüja mali saka iba ya alu nungi züsentenba chiyungtsütem merüktetsü atema dang amshir, ta metetdaksü.

April 5, 2022 nü Hong Kong nunga ketdangsertemi MDH indang Madras Curry Powder, Mixed Masala Powder aser Sambhar Masala aser Everest indang Fish Curry Masala nung 'ethylene oxide' keta aliba putetogo, ta metetdaksü.

Hong Kong Centre for Food Safety-i, parnoki food surveillance programme kübok

spices pezü samples bendena tendangba ajanga item spices nung ethylene oxide keta aliba putet, ta metetdaksü.

Iba chemical densema aliba spices ji meimchirtemi achitsü atema majung, ta shia Hong Kong nung item spices nokdangogo.

Hong Kong nung temzüng ajanga 'pesticide residues' temelaba dang nungi level tali alibaji ayoktsü memelar.

MDH aser Everest indang spices nung 'carcinogens' keta aliba osang dak sendakba nung tang tashi nungbo parnoki sangdong kecha memetetdaksü.

Rajnath Singh-i Siachen semdanga sepaitem jenjang asadangogo

Srinagar, Rongchii/April 22

(Agencies): Hombarnü Defence Minister Rajnath Singh-i alima nung tongbang raraba tesem talangtiba, Siachen semdanga iba region nung India nung sepaitem terenemshiba jenjang asadangogo.

Indian Army tem iba region nung kum 40 ajungba amongba sülen anogo ishika tsüngda Rajnath-i Siachen semdangar.

Defence minister denji

Army tongti, General Manoj Pande-a liasü aser tenati region nung security tensa ajak asadangogo, ta ketdangsertemi metetdaksü.

Rajnath Singh-isa Siachen nung aliba sepaitem ajurua sensaksemogo. Siachen glacier ya Karakoram range nung süklep 20,000 ajungketer lir aser iba ya alima nung sepaitem raraba tesem talangtiba nung aliba zone lir ta züngshir.

1984 kum April ita nung 'Operation Meghdoot' kübok Indian Army tem mezüng Siachen Glacier nung amenoka liasü.

Yakum January ita nung Siachen Glacier nung raratsü atema Army Corps of Engineers nungi Captain Shiva Chauhan lemezükja liasü aser tetsür Army officer rongnung la mezüngbuba Siachen nung raratsü atema lemezüktsü.



April 22, 2024 nü New Delhi nung Delhi Congress Tir, Arvinder Singh Lovely (abelen nungi tasembuba) aser Delhi Election Management Committee Chairman Subhash Chopra (abelen nungi tanabuba) na den North West Delhi, Chandni Chowk aser North East Delhi constituency nungi Congress Lok Sabha candidate tem- Udit Raj, J P Agarwal aser Kanhaiya Kumar nungeri osangbenertem senden ka nung jembiba sülen tangokba noksa nung angur.

NCP-i Lok Sabha election atema party manifesto sayaogo

Mumbai, Rongchii/April 22

(Agencies): Hombarnü Nationalist Congress Party (NCP) tongti, Ajit Pawar-i Lok Sabha elections atema party manifesto sayaogo.

Manifesto nung linük nung caste census agitsü atema akhangba parnokia pusemtsü, ta nangzüka lir.

NCP ya BJP teloktep nung densema lir. BJP-ibo caste census atema mejembir.

Mumbai nung lokti senden ka ayongzüka paarty manifesto sayaba sentong nung jembidang Maharashtra deputy chief minister, Ajit Pawar-i, NCP-isa taoba mapang Maharashtra chief minister aser Union defence minister, asür Yashwantrao Chavan nem linük nung tematiba civilian award, Bharat Ratna agüjang ta akhangtsü, ta metetdaksü.

"Kin mesüra yimsü kecha mebandangi meimchir ajak takum alitsü temeden lir, aser ibaji ozü party tangatetba lir. Onoki kasa züngshiba aser telongjem pusemer. Lokti nung temelenshi adokdaksür Sane Guruji-i, 'Chichiba yimsüji alima nem temeim agütsütsü atema lir' ta jembi, aser onoki iba nungji ai-aura akar. Loktiliba nung maongka mangurtem aser

jenjang tekubok nung alirtem asenoki ajungkettsütsüla. Onoki caste census agitsü atema takhangba agütsütsü," ta NCP manifesto nungji shia lir.

Ajit Pawar-i, party-i kodang takok ngudir caste census agitsü atema takhangba agütsütsü.

Taoba mapang NCP partner, Congress-ia linük tesem ajaklen caste census agitsü atema takhangba agütsüdar.

Maharashtra nung NCP ya Mahayuti teloktep nung densema lir aser iba teloktep nung Shiv Sena aser BJP nata densema lir.

NCP-isa state nung aliba Urdu medium school tem semi-English status akümtsü aser aluyimertem nem alu nungi züsentetba ajak asoshi minimum support price (MSP) agütsütsü atema takhangba agütsütsü, ta Pawar-i metetdaksü.

Paisa Ato kilonser Narendra Modi-i tesüiba kum ter tsüngda linük atema tajung aika inyakba asoshi pa nem tenüngsang agütsü.

"Modi lenisüba ajanga tan elections nung onoki takok angtsü. Pa den tokteptsüsa opposition nungi shinga mali. NDA tejakji pa lir," ta paisa shisem.



New Delhi, April 22, 2024: Hombarnü New Delhi nung External Affairs Minister S. Jaishankar aser 2016 kum kiralongrartemi amakba lendong nungi jenbur, Nidhi Chaphekar na senden ka nung tangokba noksa nung angur.

India nung anogo ka kija nung tayimtsü passenger lakh 4.71 liasü

New Delhi, April 22

(Agencies): Amongnü (April 22) India nung tayimtsü passenger ajak senteper 4,71,751 liasü aser ibaji anogo ka kija nung passenger teimtiba senzüba liasü, ta Hombarnü ketdangsertemi meetdaksü.

Amongnü tayimtsü nung senzür passenger lakh 4.71 liasü, aser ibaji Covid wara matongdang anogo shia tayimtsü nung passenger 3,98,579 senzüba den medemdangra shilem 14 agi teimba lir, ta parnoki metetdaksü.

April 21 nü India nung tayimtsü 6,128 senzü aser passenger ajak senteper 4,71,751 liasü, ta civil aviation ministry-i metetdaksü.

2023 kum April 1 nü tayimtsü 5,899 nung passenger 4,28,389 liasü. Civil aviation ministry-i X ajanga, India telung nung

tayimtsü nung senzür passenger tem teimba-teimba dang akümer, ta metetdaksü.

"India nung tayimtsü sector kanga ainer, aser ibaji mapatong shidak benokba, rongsenkettzüng tsütsü terenlok aser jenjang dalang asüba kulitem ajanga lir. Nisung teimtibai tayimtsü ajanga senzütsü maongka anguba denji külemi aviation sector-i ano maneni temaba jenjang atongtsü imlar," ta ministry-isa metetdaksü.

Taoba hopta aviation regulator DGCA-i, India telung nung January-March 2024 nung tayimtsü nung senzürtem lakh 391.46 liasü; tesüiba kumtem medemdangra taoba mapang nung kasa mapang (January-March 2023) lakh 375.04 liasü; kum shia passenger shilem 4.38 aser ita shia shilem 3.68 teimba akümer, ta metetdaksü.



TIR YIMYIM YIMOBILEM (EDITORIAL)

DIMAPUR SANGTENNÜ, APRIL (RONGCHII) 23, 2024

Alima anogo

Asenoki memetetka dang süidaktsür dang ashi, April 22 nü ya küm shia Alima anogo, Earth Day, amonger. Aji oda, taküm 2024 küm asoshia iba anogomong omen " Planet vs Plastics" ta asüba nung alima tesem balala nung sentong balala ayongzüka alima tzü mopong meraksadaktsüi alima kümzüka ayutsü asoshi mungogo. Atangji, alima anogomong yabo April 22 nü ya dang masü saka anogo ajak ya alima anogomonga ta bilema amongtsübaji alima nung alir ajak asoshi kanga tongtibang mapa ka lir. Alima (Planet) ya alima nung taküm alir ajak alidak ki lir. Iba ki yabo ka dang, anungji alima nung ya asenok taküm melitetsüsa raksara asenok jenokdak tanga lima ka maka, anungji külemi samatsüba dak alaka tanga tekümzüksü lenmang kecha mali. Iba jagi alima nung taküm junga melitetsüsa tzü mopong menenba indang bushidanga asadangertemi anogo shia asenok ajak kümdangshidakja anir. Aji oda, nungdak tuluka inyaktsüba lir ser nung amadoker alidang kari nenshi ama, küm shia April 22 nü United Nations-i anir alima ajaklen Alima anogo amongtsü sangdongba ya ajanga asenok nisung shia dang asenok aliba lima meima kümzüka ayutsü asoshi nenshia metetdaktsür. Alima nung nütsüng zünba ajanga nisungtem asoshi nungdak tali tali akümer aser item nungdak ajak atalokdakja inyakdang alima janar aser tzü mopong menendaktsür. Item janatem rongnung plastics ya ka lir. Akhi putu nungbo kechisarina alepshiratsü asoshi am aser süngo tu dang amshi aser alima nung kechisarina purapiteta aodang kakat (paper) yanglutet, anungji kechisarina alepshira nungdak asoshi kakat dang amshia aru. Atangji tanüa kakat amshir saka kakat dang nungi tajungba aser tezúbaba amshitetsüsa plastics adoka lir, anungji akhidangbo shishilemdaki yangku bener oa aliba to tangbo kecha mebeni dang ayongayonga orr kchisarina ajak plastic yangku nung dang oshir arur. Aji oda, tangbo tzü tajemtsü dena plastic pongdang nung angur, anungji lokti senden nunga tzü tajemtsü agütsütsü atema marok bushitsü menungdaker. Item ajakji plasctics ngutetba ajanga nisungtem nem anisüngzük aser tajangzük agütsüba mapatem lir. Ajisüaka, temang asoshi shi angoa tali achi majung amai, plastic agi yangluba osettem ya kodang asenoki junga mebilemdangi mashimashi amshidir, iba jagi ali tema aser telong dang masü ayong nungi tenzüker tzüim tashi menentsür. Iba jagi Tsüngremi yangluba lima ya shitak moutet kangshidaktsür. Ibaji metettsü aser angatettsü atema tanü asenoki asen alidak tesem mashika tupoka ali telong nungji plastic ali mali reprangdangtsüa akok, mesüra asen anasa tzüim meliaka anasatiba ayong kati orr tzü telong nungjia plastic ali mali reprangdangtsüa akok. Idangji dang asenoki ali aser tzü telong nung asenoki amshir endokba plastics osettem agi koda menentsür aser kangshidaktsür itemji metettsü. Iba timtem jagi ali nung süngdonglidong sadema meitsü mekoki timtem agütsür aser ayong aser tzüim nung ango akong ama taküm sangnutem taküm alitsü makoker. Atangji, tanü putu nung plastic mamshiang asenok nungdak peria meinyaktettsü, anungji plastic kenyongi mamshitsüla ta masü saka mamshi akokba tashi nungbo asenoki plastic mamshii asen nungdak inyaktsü merangtsüla. Aji oda, asenoki lokti senden nung tzü tajemtsü pongdang tila aser plastic auso amshitsü melena kakat agi yangluba marok aser auso amshira aser shishilemdaka polythene bags melena sü yangku aser kakat amshira, item jagi asenoki meteta aser memeteti asen aliba lima kümzüksü. Kasaji, asenoki amshiba plastic osettem kobasüdirsäka khen amshir endoktsüba ya masü saka aiben amshitetsüsa asenoki kümdanga amshitsü tim. Iba tangatetba nung asenok ajaki angateta inyaktsü akokba mapa temela kaji, dokan nungi asenoki bener aruba polythene bag-tem ya meindoki aiben amshira, iba jagi asen aliba lima tasen kümshidaktsür asütsü. Alimabo ka dang, anungji alima ya raksara asen alitsü ki ka anarongdena yangluteta akaba raksar amai asütsü.

OLEMSABANG

Nübur Temang Anema Alitsü Tesayuba: Anü Tatsük nungi kümzüka alitsüyim

(Public Health Advisory: Extreme Heat/ Heatwave

TEINYAKTSÜTEM (Do's)

Nübur Rangpen Asoshi (For general population)

~ Chief Medical Officer, Mokokchung, Nagaland

(Yashi adok nungi...)

Ngala ngashia alitsüyim (Stay alert)

* Radio angaa, TV repranga, Newspaper zünga tzü mopung osang meteta alitsü nungdak. Tawa tanü tzü mopung osang tejangja metettsü asoshi India Meteorological Department (IMD) website <https://mausam.imd.gov.in/> nung angutsü.

Kilung mesüra akhümbok nung kazüyim (Stay indoor /in shade as much as possible)

- * Taktang koba nung ventilation junga lir aser temokong.
- * Anü aser tatsük aitba tongdanga ayutsüla. Anüngdang window shibanger ayuba ajanga anü tatsük tongdanga ayur. Aonung arudang window lapoka ayuba ajanga taktang mokonga kümdaktsür.
- * Akokba tashi agi kima yimdongi aotsüsa kümra anepdang aser nikongdang aotsüla.

Lendongbang Nung Alirtem Asoshi (For Vulnerable Population)

Hauko, anü tatsük ajanga timtem bena aruba nungi nisung shinga jenbua mali, saka nisung karbo iba timtem ajurutsü ana nung lir aser parnok tali kümdangshia alitsü nungdaker.

Item rogotemji:

- * Kinü tanur aser tila tanurtem
- * Mashisa aliba tetsürtem
- * Moapu nung mapa inyakertem
- * Tokolok tashitak agi menepa alirtem
- * Temolungjang mesüra high blood pressure agi timtema alirtem
- * Ainlen jajar shirnok tomokong tesem nungi tatsük tesem kati arurtem lir, parnokji temang agi tatsük tizükteta maküm tsüngda hopta kabo kima yimdong nung kangabo mejajai akhüm nung kazütsüla aser tzü peria ajemtsüla. Asen temangi anü tatsük tizükteta akümtsü asoshi anogo 10-15 tashibo agitsü.

Tanga Tekümdangtsütem (Other Precautions)

- * Tain rogotem aser shiranga alirtem shirnok pei kija alir, parnok anogoshi reprangshiyima aser temang tendanga alitsü nungdak.
- * Ki mokonga ayutsü merangtsüla.
- * Anüngdang anü tatsük mapang akok tashi ki aputepa asüba tsünglanglen (downstairs) kazütsü merangtsüla.
- * Temang mokonga alitsü asoshi fan mesüra tzü nung sü metener temang nung neploka ayutsüla.
- * Tzü 20°C nung tetsüng tenüklang tashi ajemoker kazüba ajanga temang kara mokonga kümdaktsür aser yakta anisüngzük agütsür.

MEINYAKTSÜLATEM (DON'TS)

- * Anüngdang toroto mapang 12:00 ako nungi 3:00 ako tashi nung yimdongi maotsü merangtsüla
- * Anüngdang moapu nung mapa tasak meinyaktsü merangtsüla.
- * Tetsüng tesa mesenzütsüla.
- * Meyi mapang anüngdang tatsükba mapang soruchioktsü mapa matemzüksüla. Iba den soruchiokba mapang window aser kishi lapoka ayutsüla.
- * Yi, süngo, coffee aser carbonated soft drinks mesüra koba shingi (sugar) agi tanang tajemtsütem lir itemji majemtsü merangtsüla kechiyong item ajemba ajanga temang nung tzü aliba rosepdaktsür mesüra tepin nung tatutsü atudaktsür.
- * Protein kanga aliba chiyungtsü aser mapang talangka yua aliba chiyungtsütem machitsüla.
- * Tanur mesüra kidang metsüba shiruru mena yutsür gari anena meyutsütsüla. Gari telung nung tatsük adokba ajanga timtem ajurutsü ana nung lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Sangküm Pope Francis-i India semdangtsü: PM Modi



2021 küm October ita nung Ato kilonser, Narendra Modi-i Vatican semdanga Pope Francis ajurudang tangokba noksa nung angur.

April 22, 2024: India Ato kilonser Narendra Modi-i, sangküm Pope Francis-i India semdangtsüa akok; 2021 küm pai Vatican semdangba mapang nung pai India semdangtsü atema Pope Francis jaoka liasü, ta metetdaksü.

April 21 nü interview ka nung jembidang Modi-i, "India semdangtsü atema ni pa (Pope Francis) jaoka liasü. Sangküm pai semdangtsü atema sentong yanglutsüa akok," ta metetdaksü.

Catholic Khristan nütsüng aika aliba Kerala state nung April 26 nü Lok Sabha election agitsü aliba mapang ka nung Modi-i Pope-i India semdangtsü osang lemsatop.

Nütsüng million 33 aliba Kerala state nung nütsüng shilem 18 bo Khristantem lir aser iba state nung Syro Malabar Arogo aser Syro Malankara Arogo naprongla amenoka lir.

Kerala nung Lok Sabha menden 20 lir, ajisüaka tang tashi nungbo Modi-i aniba Bharatiya Janata Party (BJP)-i state nung menden ka nung danga takok ngua mali. Lok Sabha nung dang masü saka state legislative assembly nunga BJP MLA ka danga mali.

Modi-i, "Ni [October, 2021 küm] Vatican semdangba mapang nung ni temeshi putir (Pope) ajurua liasü. Küna mapang talangka sensaksem aser pai-a ozü sorkari inyakba mapatem meteta liasü. Künati onük aika nung o lemteper aser tangatetba kasa liasü," ta metetdaksü.

Taküm September ita nung Pope Francis-i Southeast Asia nung linük pezü semdangtsü, ta sangdongogo ajisüaka linük pezü nungji India bo densema mali.

Pope Francis-i Asia aiben semdangogo saka pai India bo kodanga mesemdang. 2021 küm October ita nung Pope-i,

India semdangtsü Modi-i jaokbaji pai agizükogo, ta metetdaksü.

2016 küm pope-i India semdangtsü sentong renema liasü saka Vatican-i iba sentongji thinenba sülen 2017 küm pai Bangladesh aser Myanmar na dang semdang.

BJP aser Hindu yimsü alia amangba organizations-i India nung Khristan missionary tem mapa anema nokdaker. Parnokisa Pope-i India semdangtsü alibaji anema liasü.

Interview nungji jembidang Modi-i, par party-i Khristantem densema yimsü balala ajak züngoker, ta metetdaksü.

Paisa Goa aser northeast nung aliba state tem nung Khristantem atishia jembiji.

"Goa nung ozü sorkari küm aika yimsüsüa arudar aser ibaji Khristantemi nungita yariba agi dang lir," ta paisa metetdaksü.

Ajisüaka pai, Khristantem nem tamang katetdaksütsü atema party-i ano tali temerangba inyaktsü nüngdaker, ta shisem.

"Kerala nung onok rongnung Khristan lenirtem lir. Tongti putirtem aser Khristan lenirtemi küm shia ni ponguben ajurur. Ni ajuruba mapang shia Khristan lenirtemi Congress aser communist party tem anema jembir," ta pai ashi.

Paisa, Kerala nung Arogo li aser kiojentem dak sendakba nung mangatetep ken o aika adokbaji Congress aser Left party temi shilem agiba agi lir, ta ashi.

Ato kilonseri, pai timtemer Khristantem, talisa angopur Khristantem rongsenkettsüng jenjang tajungba kümdaksüner, ta ashi.

Kerala nung parliamentary constituency pezü- - Thiruvananthapuram, Kollam, Alappuzha aser Ernakulam nung angopurtem teimbaka Catholics Khristantem lir.

Rome nung G20 senden aliba mapang 2021 küm October ita tatembanglen Vatican nung Modi-i Pope Francis ajuruba sülen tena ghonda ka jungnüa senden mena liasü.

Modi-i Pope Francis nem taribi agi yangluba milen ka aser kakat ka (The Climate Climb: India's strategy, actions and achievements on the commitment to the environment) sempet agütsü.

Pope-ia Modi nem yongmen yin agi yangluba 'plaque' ka agütsü.

Pope Francis ya alima nung Catholic Khristan nütsüng billion 1.3 madak tongti lenir, aser pai alima nung nütsüng teimba aliba linük-India semdangba mapang nung pai yimsü temeden atema jembitsü imlar.

Pope kati tesüsa India semdangbaji 1999 küm Pope John Paul II liasü.

Sudan nung rara tenzükba sülen Tenla ki 150 raksatsüogo: USCIRF

April 22, 2024: Yaküm April ita nung Sudan linük nung rara tenzükba sülen tang tashi nung Tenla ki 150 dak tema raksatsüogo, ta United States Commission on International Religious Freedom (USCIRF)-i metetdaksü.

Sudan nung Sudanese Armed Forces aser paramilitary Rapid Support Forces na tsüngda raraba ajanga nisung meyrjang aika süogo, Tenla kitem aser kiojen aika raksatsüogo.

Sepaitemi tekülem kitem aser temeshi tesemtem amaker, ta USCIRF-i metetdaksü.

USCIRF Commissioner, Mohamed Magid-i sangdong ka ajanga, "International ozüngtem kübok rara mapang nunga tekülem kitem aser temeshi tesemtembo mekongshii wazüka ayur. Arrla 53 ajanga teküzmükba agüja aliyonga Sudan nung tekülem kitem aser temeshi tesemtem

ANOGO ABEN TSÜNGREM DEN

Temeshiba metsü prokba

Saka temeshiba prokeri chichiba sempet angur. A.Shin 11:18b

Asenok taküm kümzüka alitsü lemanng aika lir saka temeshiba asoshi asenok sasa bendanga agütsüba nung sempet tulu agütsüba danga lemanng kecha nunga mali. Asenok jenjang ajak Tsüngrem temeshiba sayutsüla aji tekümtet ajanga asenok meyong lir: asenok tebilemba temeshiba asoshi bilemba asütsüla, idangji asenoki kechi bilemer aji Tsüngrem chir asoshi mapet masütsü; asenok mapa, indangji asen takümi temeshiba Tsüngrem ka tenzükker ta kuli asütsü; asenok tsüngchiba, indangji asenok tesendaktep ajak nung shingai mashishitsü.

Ne taküm nung nai Tsüngrem temeshiba sayur asü? Temeshibaji nai ne taküm nung mapa inyaktsü melaba lir. Temeshiba bilemba metsü proktsü melen, nai tebilemba nung tamajungba aser temenen tebilemba indaktsür asü? Nai shi jangraba menokdangi mesüra tatok magütsütetba ne taküm nung lidaktsür asü? Yisui ashi asenok Tsüngrem aser Pa temeshiba tema bushira Pai bendenloktsütsü (Matt. 6:33).

Temeshiba metsü prokba nung sempet tulu lir. Tang nai ne taküm nung metsü proktsü sentong lir? (1 Peter 1:15). Ne tebilemba temeshi asütsü asoshi nai ne kolok nung temeshiba koda ayur? Na tsüngchir süa alitsü asoshi ne tesendaktep nung temeshiba koda arur? Asüng nai ne taküm nung temeshiba aluruba kanüra, tanü nai temeshiba metsü azüngtsüla.

maneni raksatsür," ta Evangelical Church nung metetdaksü.

Commissioner-isa Sudan nung Khristan lenirtem aser nütsüng ajema aliba yimsü amangertem anema inyaker, ta metetdaksü.

Yaküm November 1 nü Omdurman nunga SPEC Tenla ki raksaja liasü.

Taküm January ita nung RSF sepaitemi Wad Madanu nung Evangelical Arogo Tenla ki ka rongdoktsü. Iba Tenla kiji 1939 küm asü aser iba Tenla kiji Gezira State nungbo tekülem ki tulutiba liasü. RSF-isa Wad Madani nung Coptic Christian monastery ka maaddokba sülen sepaitem camp ama amshir.

Yaküm May ita nunga sepaitemi Tenla ki ka amakdang putir ka den par jabaso ka densema Khristan pezü kasetba sülen Tenla kidang nungjagi auyar oadok. RSF sepaitemisa Omdurman nung Sudanese Presbyterian

Evangelical Church nung züngsem, Hidar Al Amin tepsetba sülen pa indang kiojen rakzük.

Ano tatalokba ka nung, tan ita tetenzüklen RSF sepaitemi Evangelical Pastor, Kowa Shamal dang Khristan yimsü tokjang ta shia reshikangshi, ajisüaka pa tasü nungi jenbuogo.

Sudan nung army aser paramilitary sepaitem tsüngda tesashiba raraba ajanga nüburttem kanga timtemba mapang nung USCIRF-i linük balala nung sorkartem aser lenirtem dang Sudan nung tekülem ki aser temeshi tesemtem kümzüksü atema international ozüng benoktsü atema inyakdaksüner, ta mepishia metetdaksüogo.

Open Doors' 2024 World Watch List nung alima nung Khristantem reshikangshiba linük tamajungtiba 50 rongnung Sudan ya jenjang 8buba nung lir.

AO OSHI ANGAZÜKDAK: TANÜ ANGAZÜKTSÜBA OJANG



Süngdongren

(n) alijak nung meyiba süngolu aser süngdonglidong telemsaren bushiba (botany)

* Tanü putu nung süngdongren indang bushidangtsü kanga nüngdaker.

Süngerlikok

(n) tedong nung atangba aonsotsü tapu ka (brinjal)

* Tzumartemibo süngerlikok lu tulu ayimer.

OLONG PAITEP # 6765

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

- 2. Teburtemi tejak nung awaba - (8)
- 6. T ___ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yahgi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6764 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü, 5. Lenti, 7. Tajangzük, 11. Teronem, 12. Sempa, 13. Jahaz.

NAI-A YA METETTER MA



Youth America Grand Prix ta ser telok kati Plaza Hotel, Manhattan nung April 17, 2024 nü sentong ka ayonga agidang Guinness World Record ka yanglutetogo. Iba sentong nung Ballet Dancers 353-i mapang talangtiba temopolaki noktaka liasü aser iba ajanga otsü tasenji yangalutet. Ballet dancing nung iba dang "en pointe" ta ajar aser parnok minute 1 tema yamaji noktaka liasü.

Tripura police-i CM Undersecretary jilu benshir ka apu

Agartala, April 22, 2024

(Agencies): Tripura Chief Minister Dr Manik Saha indang undersecretary ka jilu benshir ka police-i puogo.

Iba nisung yagi journalist ka aser shishilembar ka ashioktsütsü meranga liasü.

Iba nisung ya Arup Deb ta jangjaogo aser pai media outlets aika dangi phone asü aser CM office den sendaktepa lir ta ashi.

Headlines Tripura News Channel yimozülur aser senior journalist Pranab Sarkar dangi temulung malemtsüsa phone ka aruba sülen Arup Deb indang maparen putet. Deb-i Sarkar dang advertising maongka kar agütsüba atema tajangzük kar meshia liasü.

Sarkar-i ashikülak mapa ta bilemba agi Chief Minister's office den Deb indang maitsü jangjatsü



merang aser idangji putet. Iba osang angazükba sülen Chief Minister Dr Manik Saha aser tongti police ketdangsurtem nem osang sangoktsü aser Deb apu.

"Deb-i advertisement

placements atema mobile phone ana süpokrem meshi. CM's office den asüngdangtepdang pa kecha shilem maliba metet. Iba jagi ni pa tashi angaa pa den jembu aser police-i pa apu" ta Sarkar-i ashi.

Lok Sabha election 2024 nung AIUDF tembangtsü: Akhil Gogoi

Guwahati, April 22, 2024

(Agencies): Assam nung AIUDF (All India United Democratic Front) maparen samaa aor ta Sivasagar MLA aser Rajgor Dal tanishir Akhil Gogoi-i ashi.

Karimganj nung osangbener den jembidang AIUDF maparen mali kümogo aser parnok lennir Badruddin Ajmal-i Dhubri o Karimganj constituency tem nung tamakok angutsü ta Gogoi-i ashi.

"Assam nung Muslim nunger tangatetba melenshiogo aser

nenoki AIUDF den pilaa alitsüla. Ajmal ya BJP-RSS (Bharatiya Janata Party-Rashtriya Swayamsevak Sangh) teloktep nung dena lir" ta Gogoi-i ashi.

2024 Lok Sabha elections nung Ajmal'er yimtenren wadang tembangtsü aser nübertem aser talisa Barak Valley nung alirtemi pa den tepila salem ashitsü, ta paisa ashi.

BJP lennir Sarbananda Sonowal-i Dibrugarh nungi tokteper aser pai tamakok ngura

iba tebilemtsüji Chief Minister, Himanta Biswa Sarma-i abentsü. Iba ajanga Assam nung BJP lenisüba nung tashi toktepa sayur, ta Gogoi-i ashi.

Karimganj constituency nung Congress candidate Hafiz Rashid Choudhary-i takok angutsü aser ibaji nübertemi AIUDF magizükba ajanga asütsü, ta paisa metetdaksü.

Assam yimtenren tensa melenshitsü aser AIUDF-i tamakok tulu anguba den tongti nisung aikati tamakok angutsü ta Akhil Gogoi-isa ashi.

Assam: LS election shilem tasembuba atema nominations 8 magizük

Guwahati, April 22, 2024

(Agencies): Chief Electoral Officer (CEO) Assam-i nominations jungjunga repringba sülen candidate 8 indang nominations magizük.

Candidate 8 rongnung Guwahati Lok Sabha constituency nungi ana dena lir.

Lok Sabha Constituency 4 nungi candidate 8 indang nominations magir. Kokrajhar nungi candidate ka, Dhubri

nungi pezü, Barpeta nungi ka aser Guwahati Lok Sabha constituency nungi ana lir ta CEO, Assam-i metetdaksü.

Lok Sabha elections shilem tasembuba atema candidate 52 indang nomination papers agizükogo ta paisa ashi.

Guwahati Lok Sabha menden nungi candidate anaji Nayan Das (Bharatiya National Janata Dal) aser independent candidate Arpita Choudhury lir.

Guwahati nung Bijuli Kalita Medhi (BJP), Mira Barthakur Goswami (Congress), Samad Choudhury (Bharatiya Gana Parishad), Chejan Goyari (Bahujan Maha Party), Amitabh Sharma (Ekam Sanatan Bharat Dal), Dipak Kumar Boro (Voters' Party International), independent candidate Kazi Nekib Ahmed aser independent Col. Gokul Chandra Singha nunger indang nomination papers agizükogo.



Gossaigaon, Assam nung TMC election headquarters nung TMC Assam state president Ripun Bora-i osangbener den jembidang agiba noksa ka angur. Iba mapang Bora-i Bodoland Territorial Region (BTR) dak sendakba onüktem lemsatop aser National Register of Citizens (NRC) o D voters inyakyimanentsü nenshia liasü.

Tir Muizzu-i aniba teloki Maldives election kokogo

Male, Rongchii/April 22 (Agencies): Maldives nung parliamentary election agiba nung Tir Mohamed Muizzu'er teloki kanga junga takok nguteta pa jenjang tali tajungba kumogo.

Provisional results nung People's National Congress (PNC) yagi züngsem 93 aliba house nungi menden 66 nung takok anguba sayur.

Iba takok ya ajanga Tir Muizzu-i China den tesendaktep tajung alitsü merangba nung yarisemer ama ajiteter.

Muizzu ya China meimer ama angateter aser par linük nung akhi mapang nungi India-i tongti shilem agiba pai ajemdaktsüner.

PNC ajanga akokba ya "super majority" ta yangji aliba media temi ashir, koba anogo ishika nungang jangjatetsü. Constitution yanglushitsü asoshi nung dang takok angu. Deobarnü vote

Opposition Maldivian Democratic Party (MDP) yagi menden 15 nung dang takok angu. Deobarnü vote

magütsütep dang parliament nung par menden timba liasü.

"Ibai Muizzu asoshi takok tulu lir. Yimtenren tsütsü nungia tangbo ajak Muizzi kübok lir. Pai judiciary-a azüoktettsü, kechiaser parliament nung nüngdakba ama par telok peria lir," ta University of Western Australia nung lecturer aser Maldives analyst, Azim Zahir-i ashi.

Muizzu ya taoba küm tatemlen yimsüsüba mendeni aru aser par linük indang "India first" policy tatem kumdaktsütsü asoshi nübu yima liasü, koba taoba sorkari amshia aru. Pai tang tashi Delhi mesemdangi lir.

Pai Delhi indang tashi ajemdaktsütsü mechi Maldives nung aliba India nunger sepai ajak meyipa yoktsü nangzüka lir.

Timtem nung alirtem kumzüksü aser reconnaissance mapa inyaktsü asoshi helicopter ana aser tayimtsü ka anepalua amshitsü atema Maldives nung India nunger sepai 85 shi lir. Iba tayimtsü ya küm ishika tejakdang Delhi-i tenla agüja liasü.

Indian military personnel batches ana Maldives nungi ainshiogo aser parnok melena India indang civilian technical staff tem oa lir. Tanungba sepaitem ya May 10 tashinung Maldives nungi ainshitsü imlar.

Pai Indian sepaitem meyipa yoktsü telemtetba agiba ajanga Males aser Delhi tsüngta tesendaktep mejungi akum aser Beijing-i iba maongka agitsü jangra lir ama ajiteter.

Muizzu ta January ita Beijing semdanga investments atema tezüngzüktep balala yanglutepa liasü.

March ita Male-i China den non-lethal weapons atema angati military assistance agreement ka zülutepa liasü aser Maldives security forces nem training agütsütsü pangjem. Taoba mapang India aser US-i Maldives sepai nem training agüja liasü.

Deobarnü election agiba osang tejangja metettsü asoshi hopta ka junga agitsü imlar.

Deobarnü election nung vote agütsü arur shilem 73 liasü aser 2019 küm shilem 82 liasü ta Maldivian Election Commission-i ashi.

MDP mendenpuba Fayyaz Ismail-i Muizzu nem takok tenüngsang agütsü aser MDP MP temi nüburttem khuret angatetba opposition ama ochishia sorkar den teka amteper inyaktsü, ta social media nung ashi.

North Korea-i ballistic missile ishika tendangogo

Seoul, Rongchii/April 22 (Agencies): North Korea-i Hombarnü linük anütoklen tzüym leni short-range ballistic missile ishika khaketa yokogo, ta South Korea indang military-i metetdaksü. Iba jenjang agiba ya Seoul-i aitsüogo aser ashiba agi, iba ajanga Korean peninsula nung tensa tamajungba kümdaktsütsü.

Kasa mapang nung Japan sorkari coast guard nem küm kuma alitsü atema tetuyuba agütsü aser ashiba agi, North Korea-i ballistic asütsü ta bilemba missile kar tendangogo. Missile tem ya Japan indang exclusive economic zone temalen tsük, ta NHK broadcaster-i ashi.

South Korea indang Joint Chiefs of Staff-i ashiba agi, North-i short-range ballistic missile asütsü ta bilemba missile tem linük yimtiba Pyongyang anasa tesem ka nungi khaaketa yoka liasü. Missile tem ya kilometer 300 shi yima ao aser tzüym nung tsüka liasü.

North indang reconnaissance satellite development aser Pyongyang o Moscow na military dak sendakba nung tensendaktep akangshiba indang sensaksemstsü atema Admiral Kim Myung-soo-i ayongzüka U.S. Space Command,

General Stephen Whiting den Hombarnü sensaksemba mapang North-i missile tendangba osang agüja liasü.

September ita linük ana lenirtem summit ka amenba sülen, Ukraine den rara nung amshitsü atema North-i Russia nem prangbong injang agüja alitsü ta temulung melemi bilemer, ajisüaka linük anapronglai iba taitsuba ya magizük.

November ita reconnaissance satellite ka orbit-i takok ngua yokba sülen ano spy satellite ka yoktsü atema North renemdar ta amanger.

North Korea-i taoba hopta ashiba agi, parnoki warhead tulu ka tendangtsü atema strategic cruise missile ka aser anti-aircraft missile tasen ka tendangogo.

April ita tetenzüklen North-i, parnok ket nung aliba missile ajak atema solid-fuelled missiles yangluba nung shilem ka ama intermediate-range hypersonic missile tasen ka tendangogo. Iba tetendangba ya lenir Kim Jong Un-i achaaayanga liasü.

North Korea-i, ballistic missiles meyaglutsü atema United Nations Security Council-i tenokdangba agütsür aliba mangai linük kümzüka ayutsü nungdem nung iba jenjang agia arudar.

Israel military intelligence tekolakbai mapa toktsüogo

Jerusalem, Rongchii/April 22 (Agencies): October 7 nü Hamas teloki Israel mamak tsüngda jenjang shidak magitetba atema Israel military intelligence tekolakbai pa mapa toktsüogo.

Israel Defense Forces (IDF)-i ashiba agi, temelener ka shimba sülen Major General Aharon Haliva-i pa mapa toktsütsü.

Pai shiti ka ajanga, pa indang intelligence directorate-i nongloktsüba mapa imalaba ama minyaktet, ta ashi.

Iba tatalokba dak sendakba nung lenir tejente rongnung pa mezüngbuba mapa nungi anenogo. Israel puti otsü nung October 7 nü lendong atalokba ya ajak dang tamajungtiba liasü.

Israel military aser intelligence ketdangsürtemi tekümdangtsü metetdaksüba mangazü mesüra sentoka toktsü, aser iba ajanga Hamas puri Gaza arrtsü adena aita arrtsü anasa aliba loktitem, military base aser iba den kenten benjung ka maka liasü.

Iba lendong nung Israel nunger aser bendanger (civilian timba) 1,200 tepset aser nisung 253 Gaza-i pur ao.

Iba tatalokba dak sendakba nung Israel-i meyiper Hamas telok samatsütsü aser pur or alirtem meyipa anir arutsü nükjidong nung Gaza amak tenzük.

Gaza nung tang tashi nung Palestine nunger 34,000 dak tema tepsetogo, kong tetsür

aser tanur timba densema lir, ta Hamas indang health ministry-i ashi.

IDF-i Hombarnü sangdong ka ajanga ashiba agi, Maj Gen Haliva-i, intelligence directorate tekolakba ama pai anir inyaksangshia aliba mapang October 7 nü lendong tulu atalokogo aser iba khuret pai abener ta shia pa mapa nungi anentsütsü mepeshia liasü.

Pa indang resignation shiti nung general Haliva-i, "anogo ka nungi anogo ka aser aonung ka nungi aonung ka ta ni iba tamang anogo ya bilemteter. Iba rara indang tashiba ya ni teti abentsü," ta ashi.

Paisa, iba ken o kanga junga bushisüngdangtsü atema state commission of inquiry ka amenoktsü ayongzüka liasü.

"Ni IDF nung inyakba mapa kechisa inyakogo, item ajak ya Israel nunger aser State of Israel atema liasü," ta pai shisem.

Maj Gen Haliva-i mapa toktsütsü ta imla liasü, kechiyong lendong atalokba sülen anogo 10 lir pai, pa indang directorate-i tamakok anguba khuret ajak ya pai abener ta ashi.

Kasa mapang nung IDF's chief of staff, Lt Gen Herzi Halevi, aser Shin Bet security service, director Ronen Bar napronglai lendong nungi Israel nunger tem kümzüka meyutsütetba ya parnok tai ta shiogo, ajisüaka Gaza nung rara atema mapa metoktsütsü telemtetba agi.

2023 küm alima nung mitkar tsütsü sen trillion \$2.4 indok

Stockholm, Rongchii/April 22 (Agencies): Alima nung 2023 küm mitkar tsütsü sen trillion \$2.4 indok aser India ya jenjang pezü buba nung liasü aser mitkar tsütsü sen billion \$83.6 indok, ta Stockholm International Peace Research Institute (SIPRI) ajanga ashi.

2023 küm mitkar tsütsü sen timtiba indokba linük asemji United States, China aser Russia liasü.

Mitkar dak sen indokba ya talisa Europe, Middle East aser Asia nung timba liasü, ta SIPRI sangdong ka nung ashi.

"Alima nung tensa mejungi akumba ajanga mitkar tsütsü tesüngmangtsüka rongsen indoker. US-i mitkar tashi itshiba tsütsü temulung agütsür saka dangartemi telangzüba magütsütsüsa kanga kumdanga inyaksangshir," ta SIPRI indang Military Expenditure and Arms Production Programme nung senior researcher Nan Tian-i ashi.

Alima nung mitkar dak sen timtiba indokba jenjang tanabuba nung aliba China-i 2023 küm mitkar nem sen billion \$296 lezmüksü, koba

2022 küm dang shilem 6.0 agi timba liasü.

China-i mitkar tsütsü küm shia sen tali-tali indoka aruba 29 ben buba alitsü. Asia aser Oceania region nung mitkar tsütsü senotsü indokba tesadang ka China nungi lir. China-i mitkar tsütsü senotsü yamaji indokba ajanga lar kidanger linüka aika mitkar tsütsü sen timba indoker, ta SIPRI ajanga ashi.

Russia-i mitkar dak rongsen indokba ya shilem 24 timba kuma 2023 küm sen billion \$109 liasü, aser Russia-i 2014 küm Crimea rakzüka sülen tang tashinung shilem 57 timba akumer alitsü.

Russia sorkari maparen balala nung sen indokba shilem 16 bo mitkar dak indokba liasü.

"2023 küm mitkar dak sen timtiba indokba linüktem rongnung Ukraine jenjang ti buba nung liasü, kechiaser parnoki shilem 51 timba kuma sen billion \$64.8 indoka liasü. Ibai sorkari maparen balala nung sen indokba shilem 58 alitsü. 2023 küm Ukraine mitkar dak sen indokba ya Russia-i indokba shilem 59

liasü," ta ashir.

Kasa küm Ukraine nem mitkar teyari sen billion \$35 shi agüja liasü aser yangji US-i sen billion \$25.4 jenjang teyari agütsüba dena lir. Item teyari anguba aser Ukraine mitkari indokba ya meyoktepra, Russia-i indokba shilem 91 shi den sako asür.

2023 küm NATO züngsem linük 31-i mitkar dak senotsü indokba ya sen billion \$1341 liasü, koba alima nung indokba shilem 55 alitsü. US-i mitkar dak senotsü indokba shilem 2.3 agi timba kuma 2023 küm sen billion \$916 indok aser ibaji NATO-i mitkar dak indokba shilem 68 alitsü.

Middle East nunga timba indok, kong Israel - region nung second-largest spender - yagi shilem 24 timba kuma 2023 küm sen billion \$27.5 indok aser ibai talisa October 7 nü Hamas-i amakba langzüa Gaza nung raraba ajanga lir.

2023 küm Middle East nung mitkar tsütsü rongsen timba indokba linükji Saudi Arabia-i alitsü aser parnoki shilem 4.3 timba kuma sen billion \$75.8 shi indok.

NCA-i ayongzüka Senior Men's Inter-District One Day asayamung asayatsü

Dimapur, Rongchii/April 22 (TYO): Honourary Secy. Shri Hyunilo Anilo Khing ajanga Nagaland Cricket Association-i Inter-District Senior Men's (One Day Matches) tournament 2024 aser Boys Under-16 (Multi Days) Inter-District Tournament 2024 April aser May ita ayongzüka metetdaksüogo.

Senior Men's Inter-District asayamung ya April 23 nungi May 7 tashi Nagaland Cricket Stadium aser Sovima Cricket Ground nung asayatsü aser Boys Under-16 (Multi Days) Inter-District Tournament ya April 25 nungi May ita tashi asayatsü.

Tang mezüngbuba Boys Under-16 Inter-District Tournament ya Nagaland kübok district asem nung asayatsü. Group-A nung Peren, Chumoukedima aser Niuland densema lir aser iba telok ya Peren District-i ayongzüka asayatsü. Group-B ya Kohima district nung asayatsü, kong Kohima, Dimapur aser

Tseminyu densema lir aser Group-C asaya Mokochung District nung asayatsü, kong Mokochung, Wokha aser Zunheboto densema lir.

Asayamung ya BCCI tetuyuba dak ajemdaker asayatsü aser telok ajak nungi qualify asüba team tanabuba round Nagaland Cricket Stadium, Sovima nung asayatsü.

Maneni Nagaland nung Cricket asaya jenjang ka tejakdangi tua tebur Senior Inter-District Tournament 2024 ya One Day Matches format (50 overs) nung asayatsü. Anotang mezüngbuba taoba mapang asayamung tem asadangba süen ponglang nung aliba team tenet qualifying rounds asayatsü aser final round-i aitsü kong parnok temaba jenjang nung aliba district team 6 den asayatsü.

Qualifying round asayatsü aliba team tem rongnung Zunheboto, Mon aser Kiphire Group A nung ata lir aser Group B nung Phek, Tseminyu, Longleng aser Peren lir. Telok

anaprongla nung takok anguba team final round-i aitsü kong parnok temaba jenjang nung aliba team trok den asayatsü.

Final round atema Group A nung Mokochung, Kohima, Dimapur aser Qualifier group-A akokba team aser Group-B nung Niuland, Wokha, Chumoukedima aser Qualifier group-B akokba team densema alitsü.

Nagaland nung Cricket asaya kanga kara renloka odar aser BCCI tawabangba kübok Domestic Cricket asaya format balala nung state tenüng nungi asayatsü atema asayartem NCA selector temi asadanga atatsü, aser state aser tanga state nung professional coach tem tawabangba kübok camp balala nung shilem agitsü atema asayartem shimtsü asoshi selection trials atema jaoktsü.

Maneni NCA-isa state nung cricket asaya meimer aser repringtsü jangrartem dang Nagaland nung cricket asaya renloka aoba repringtsü asoshi pelashishia jaokogo.

Kohli dang pa indang match fee shilem 50 senchi achi



New Delhi, Rongchii/April 22 (Agencies): Deobar aonung IPL nung Royal Challengers Bengaluru aser Kolkata Knight Riders na asayaba mapang umpire-i telemtetba agiba anema nokdakba atema Virat Kohli dang Hombarnü pa indang match fee shilem 50 senchi chiogo.

Eden Gardens nung KKR pur run ka agi makokba asaya nung Harshit Rana-i ball aonba mapang Kohli ya no ball asütsü ta bilemba ball ka nung out agüja liasü. Rana-i aonba ball ya Kohli teberem adena tua liasü, koba yimya agi no ball agütsür.

Ball ya shitak asü masü tendangtsü atema Hawk-Eye technology amshia, koba ajanga no-ball indang height asadanger. Iba technology amshiba sülen Kohli-i ball ya pa teberem adener kongshiba nguogo saka ball ya alileni luya liasü.

Iba ball azükba mapang Kohli shibai ball tenet nung run 18 yanglur liasü pa ya line adena adoker nokdaka liasü.

TV umpire Michael Gough-i height asadang aser Hawk-Eye tracking amshiba sülen Kohli ya line shitak nung nokdaka ali asübo ball ya pa indang teberem ajanga süila ta ngutet aser ibayongji out agütsü.

On-field umpire den asatepba sülen Kohli ya ground toktsür tugua liasü.

Out masü ta bilemba ka nung out agütsüba atema Kohli kanga tezü adang aser pai mit adoka away team dressing room ana yua aliba waste-bin ka laodaktsü.

"Royal Challengers Bengaluru nungi batter Virat Kohli-i, Kolkata Knight Riders den April 21 nü Eden Gardens, Kolkata nung TATA Indian Premier League (IPL) 2024 asaya 36buba asayaba mapang IPL Code of Conduct nung aibelenba atema pa indang match fee shilem 50 senchi chiogo," ta IPL sangdong ka ajanga metetdaksü.

"Kohli-i IPL Code of Conduct, Article 2.8 kübok Level 1 aibelen ka menaogo. Pai aibelenba nangzükogo aser Match Referee-i temerenshi agütsüba agizükogo.

"Code of Conduct kübok Level 1 aibelenba atema Referee-i kechi telemtetba agütsüdir aji tatembang asütsü," ta kasa sangdong ajanga metetdaksü.

IPL's Code of Conduct, Article 2.8 kübok Level 1 aibelen ya umpire-i telemtetba agütsüba anema nokdakba dak sendaka lir.

Madrid Open: Djokovic masayatsü; Nadal mezüngbuba Darwin den asayatsü



Rongchii/April 22, 2024 (Agencies): World number one aser otsüsütsüsa Grand Slam 24 koker aliba asayar Novak Djokovic iba hopta Madrid Open nung masayatsü.

Media sangdong balala ajanga ashiba agi, arishi küm 26 tain Serbia nunger asayar ya Hombarnü draw nung mezüngoksemba sülen asayamung nung shilem magitsü telemtetba agia liasü.

Novak-i taküm asayamung ka danga koka mali aser pa tang tashi nung asayamung pezü nung dang shilem agir lir. Pai asayamung aika nungbo shilem magitsü atema telemtetba agiogo.

Kasa mapang nung asayar

tejen Rafael Nadal yirur mapang talang ka masayai liasü saka Madrid nunga asayatsü asoshi telemtetba agiogo, aser pa mezüngbuba round nung arishi küm 16 tain America nunger asayar Darwin Blanch den asayatsü.

Küm pezü tsüingda taküm agi tasembenbuba Djokovic-i Madrid Open nung shilem magitsü telemtetba agiogo.

Ajisüaka Serbia nunger asayar ya May 26 nungi tenzüka asayatsü aliba French Open nung pa indang title defend masü tsüingda Rome nung Italian Open nungbo asayatsü imlar.

Djokovic-i Madrid Open ya asemben tashi koka lir. March

ita Miami Open nung masayaba sülen pa tang agi tanabuba Masters 1000 asayamung ka nungi atsiunginer.

Deobarnü Santiago Bernabeu nung Real Madrid-i goal 3-2 agi Barcelona akokba asaya repringertem rongnung Djokovic-a densema liasü aser pa Hombarnü Laureus Awards sentong nung shilem agitsü imlar, kong pa Sportsman of the Year trophy atema nominate süa lir.

Arishi küm 37 tain Nadal yirur aliba nungi meyipa arur Barcelona Open nung asayaogo, ajisüaka pa tanabuba round nung Alex de Minaur-i straight sets nung koka liasü.

Tang Madrid Open nung pai Blanch kokra pa tanabuba round nung ano Australia nunger world number 11 De Minaur den asayatsü.

Madrid Open tesüsabuba koker alisang aser second seed asayar Carlos Alcaraz-ia pa Madrid nung asayatetsü imlaba lemsatepogo aser pa tanabuba round nung Alexander Shevchenko mesüra Arthur Rinderknech den asayatsü.

Djokovic masayaba sülen world No. 2 asayar Jannik Sinner iba asayamung nung top seed asayar lir, aser pa tanabuba round nung külem Italy nunger asayar Lorenzo Sonego mesüra qualifier ka den asayatsü.

Race Walking Team Championships: Akshdeep & Priyanka na Paris atema qualify süogo

Rongchii/April 22, 2024 (Agencies): India mixed relay team nung Akshdeep Singh aser Priyanka Goswami na Deobarnü World Athletics Race Walking Team Championships nung jenjang 18buba nung tembangba sülen Paris Olympics atema qualify süogo.

Iba asayamung nung temaba jenjang nung tembangba team 22 Olympics atema qualify asür aser India nunger tarep yagi km 42.195 talang walk race ya mapang 3:05.03 nung tongteta liasü.

Mixed team relay walk race asaya yimya nung atakzükja aliba alizüing ya tetsür khen tebur khen ta melentepa aoer.

Tetoktepba nung tebur asayartemi tama km 12.195 ajar aser iba sülen tetsürtemi km 10 aser ano teburtem km

10 jajaba sülen tatembangbuba km 10 ya tetsürtemi ajar. Leg ajak metenzük tsüingda melentepsü atema meter 20 tawa alir.

Iba tetoktepba ya Italy tem nung Francesco Fortunato aser Valentina Trapletti nati koka gold medal nguogo. Tenati alizüing 2:56:45 nung tongteta liasü.

2:56:45 nung alizüing tongtetba ya tena atema tang tashi nung timing tajungtiba asütsü. Tena sülen Japan nunger tarep Koki Ikeda aser Kumiko Okada na liasü. Tenati alizüing 2:57:04 nung atong.

Maneni kasa tetoktepba nung bronze medal ya Spain nunger tarep Alvaro Martin aser Laura Garcia-Caro nati angu. Tenati 2:57:47 nung alizüing tongteta liasü.

BILEMDANGANG

"Mapa ajak nung peisasa dak tamang kateta inyangang."